

**ANG**

# Bayan

Pahayagan ng Partido Komunista ng Pilipinas  
Pinapatnubayan ng Marxismo-Leninismo-Maoismo

Edisyong Hiligaynon  
Tuig XXXIV Numero 4  
Marso 22, 2003  
[www.philippinerevolution.org](http://www.philippinerevolution.org)

*Editoryal*

## Pamatukan ang pagpanalakay sang US sa Iraq

**Nagakadapat nga himuon sang pumuluyo sa bilog nga kalibutan ang tanan nga paagi para paslawon ang indi matarung nga gera sang US**

**M**abaskog nga ginakundenar sang Partido Komunista sang Pilipinas ang armadong pagpanalakay sang gubyernong US sa Iraq. Ang unilateral kag arogante nga paglunsar sang gera lubos nga paglapak sa soberanya sang Iraq kag kahilwayan sang pumuluyong Iraqi.

Pagpangbastos ini sa mga prinsipyo sang alalangay nga kinamatarung, soberansya kag kahilwayan sang mga pungsod, indi pagsalakay sa isa kag isa kag indi magpasilabot sa mga pangsulod nga halambalanon sang pungsod.

Nagakadapat kag kinahanglan mag-isa ang pumuluyo sa bug-os nga kalibutan kag ihatag ang tanan nga maiamot agud tapuson kag paslawon ang pagpanalakay nga ini sang imperyalismong US.

Arogante nga naghatag si Presidente George W. Bush sang US sang 48-oras nga ultimatum sad-tong Marso 18 agud magsurender ang gubyerno sang Iraq kag gingamit ini alagyan sa paglunsar sang gera. Tuyo sang US nga lusubon ang Iraq agud pukanon ang gubyernong anti-US kag makapwesto didto ang papet nga rehimen. Matarung ang gubyernong Iraq nga kundenahon ang ultimatum. Nag-

hatag ini sang kaugalingon nga ultimatum kay Bush nga magpanaog sa pwesto bangud sa wala kinamatarung nga pagpanggera kag mala-la nga pagkahamulag sini subong sa kalibutan.

Duha ka adlaw nag ginpaulanan sang bomba ang Baghdad, kabisera sang Iraq. Kadungan sini, nagsalakay ang mga suldadong Amerikano gamit ang ila mga tangke sa mga banwa sa nabagatnan nga bahin sang pungsod.

Mabaskog ang kaakig sang pumuluyo kag gubyernong Iraq labi na sa pagpanghulog sang mga bomba sa mga balay kag bilding sang sibilyan sa Baghdad. Mga sibilyan, lakip ang pila ka bata, ang namatay sa pagpangbomba. Nakahanda subong ang pumuluyo kag mga suldadong Iraqi nga depensahan ang ila pungsod. Ginakonsolidanila subong ang ila kubay kag ginahulat ang pagsulod sang mga tropang Amerikano sa pinakasulod sang Iraq agud batuan sila sa pamaagi nga gera nga regular kag di regular. Nakahanda ang armado kag di armadong pumuluyo sa paglunsar sang patriyotikong gera.

Arogante nga ginwahig sang US ang pagpamatuk sang malapad nga masa sang pumuluyo sa kalibutan, sang kadam-an nga pungsod kag



***Mga tampok sa  
isyu nga ini...***

**Ginsalakay na sg US  
ang Iraq**

**PAHINA 3**

**Ika-34 anibersaryo  
sg BHB**

**PAHINA 5**

**98 armas naagaw  
sg BHB sa Surigao**

**PAHINA 6**

pati na ang kadam-an sang mga alyado sang US. Pilit ini nga nagmanioobra, nagpadihot kag naglubid sang kon anano nga kabangdanan para makakuha sang suporta para sa pagpanggera sa Iraq. Sa katapusan, bangud pat-ud nga malutos ang resolusyon nga ginapamilit sini ipasa sa United Nations, gin-unahan, ginbastos kag ginhimo nga inutil sang US ang pangkalibutanon nga kapulungan.

Ginapakita sang wala hawid-hawid nga pagpanglapak sa mga proseso internasyunal kag diplomatiko nga wala tuyo ang US nga magpaidalom sa desisyon sang mas madamo nga pungsod sa bug-os nga kalibutan. Ginapakita sini nga ang solo nga desaysibo amo ang superyoridad militar bilang nagso-lohanon nga imperyalistang *superpower* sa kalibutan. Ginapakita sini nga sarang bastuson ang mga sandigan nga prinsipyo sang sibilisadong relasyon sa tunga sang mga pungsod kag lapakon ang soberanya kag kahilwayan sang anuman nga pungsod.

Ginatungdan subong sang US ang nangin makangingil-ad nga papel sang mga pasistang Germany, Japan kag Italy sadtong ikaduha nga

inaway pangkalibutanon. Wala tungpong sa nagtaliwan ang gin-ani subong nga kaakig sang imperyalismong US halin sa pumuluyo kag sa nanari-saring pungsod sa kalibutan.

Ang malala nga unilateralismo kag pagpangita sang US sang gera duso sang dalok nga paghandum sini nga bag-uhon ang dibisyon sang kalibutan sa tunga sang mga imperyalista, palaparon ang hegemonya sini sa Iraq, magbutang diri sang idu-idu nga rehimen, angkunon ang manggaranon nga langis sang Iraq kag kontrolon man ang kadam-an nga suplay sang langis sa Middle East kag bug-os nga kalibutan. Duso man ini sang desperasyon sang imperyalismong US sa tunga sang napakalala nga krisis sa ekonomya.

Lubos ang kinamatarung sang Iraq nga batuan, waskon kag ubuson ang mga nagaatake nga dumuluong nga armadong pwersa kag paslawon ang plano nga paluntaron didto ang imperyalistang ga-hum sang US.

Nagasaludo ang PKP sa ginapakita nga militansya kag kalig-on sang pumuluyong Iraqi agud pangapinan ang ila pungsodnon nga soberanya kag pamatukan ang mga

dikta sang *superpower* nga imperyalistang US. Wala sang iban nga dapat himuon ang pumuluyong Iraqi kundi ang maglunsar sang isa ka patriyotiko nga gera batuk sa agresyon sang US.

Sa atubangan sang imperyalistang pagpanggera sang US sa Iraq, ang mga rebolusyonaryong pwersa kag pumuluyo sa kalibutan dapat maglunsar sang tanan nga posibleng pamaagi kag porma sang paghimakas agud batuan kag pukanon ang imperyalismong US.

Kinahanglan mag-isa ang rebolusyonaryo kag pumuluyong Pilipino kag tanan nga pumuluyo sa kalibutan sa pagbatu sang pumuluyong Iraqi sa armadong agresyon sang US. Ang paglapak sang US sa soberanya kag kahilwayan sang Iraq, labi man nagadaku ang pama-hog nga agresyon sang US sa Pilipinas. Kabahin sang katungdanan internasyunalista naton ang pagbatu kag pagpaslaw sa agresyon sang US sa atong pungsod. Kinahanglan kundenahon kag batuan, gamit ang tanan nga posibleng pamaagi, ang bulag nga pagsuporta sang rehimen Macapagal-Arroyo sa imperyalistang amo sini. Kinahanglan pukanon ang mga subyer-no nga nagasuporta sa gerang agresyon sang US sa Iraq.

Ang mga rebolusyonaryong pwersa kag pumuluyo sa US kag sa iban pa nga mapanggera kag pasistang kahimbon sang US dapat maglunsar sang tanan nga posibleng porma sang paghimakas—ligal kag iligal, armado kag di armado—agud pungan ang agresyon batuk sa Iraq kag bunalan ang mga imperyalistang gubyrno nanday George W. Bush sang US, Tony Blair sang US, Jose Maria Aznar sang Spain kag John Howard sang Australia.

Lubos nga husto ang panawagan sa pumuluyo sang mga imperyalistang pungsod nga ini nga kambyuhon ang imperyalistang gera sa mga gera sibil batuk sa tagsa-tagsa ka mapanggera nga gubyrno nila. **AB**



Taon XXXIV Blg. 4 Marso 22, 2003

Ang Ang Bayan ginabantala sa lengwahe nga Pilipino, Bisaya, Iloko, Hiligaynon, Waray kag Ingles.

Mahimo ini i-download halin sa Philippine Revolution Web Central nga makit-an sa:

[www.philippinerevolution.org](http://www.philippinerevolution.org).

Nagabaton ang Ang Bayan sang mga kontribusyon sa porma sang mga artikulo kag balita. Ginabuyok man ang mga bumalasa nga magpaabot sang mga saway kag rekomendasyon sa ikauswag sang aton pahayagan. Malab-ot kami paagi sa e-mail sa: [angbayan@yahoo.com](mailto:angbayan@yahoo.com)

## Kaundan

### Editorial

Batuan ang pagpanalakay sg US sa Iraq **1**

Umatake na ang sapat **3**

Batuk sa gera ang mga Pilipino **4**

Ika-34 anibersaryo sang BHB **5**

Madinalag-on nga TO **6**

### Mga ulat koresponsal

Napaslwan ang *all-out war* sa Panay **7**

Mga suldao nga US sa Panay **8**

Isganan nga Pulang kumander **9**

Balita **11**

Ang Ang Bayan ginabantala duha ka beses kada bulan sang Komite Sentral sang Partido Komite sang Pilipinas.

# Umatake na ang sapat

**Sa pag-atake sa Iraq, lubos kabugalon nga ginapakita sang US sa kalibutan nga wala ini sang ginapakasin-o kundi ang makinaugalingon nga imperyalistang interes**

**S**ining Marso 20, gin-umpisahan na sang imperyalismong US ang matalaw kag wala hawid-hawid nga pagpangbomba sa Iraq. Bilang sapat, naglunsar man sang pagpangbomba ang Iraq batuk sa mga pwersang Amerikano nga ara sa lindero sang Kuwait. Ginapanginwala sini ang ginapalapta sang US nga handa na kuno ang daku nga bahin sang pwersang militar sang Iraq nga magsurender kag magbatu sa rehimen ni Saddam Hussein.

Ginsundan ini sang mas malala pa nga pagpangbomba na nakatunod sa pamalay ni Saddam Hussein kag iya mga anak nga babaye. Ginsukob man sang mga pwersang Amerikano ang nabagatnan nga bahin sang pungsod kag gin-okupar ang isa ka banwa nga ara sa lindero sang Iraq kag Kuwait.

Ginapagguwa sang US nga patimaan pa lamang ini sang mas dalagku nga atake. Sa amo pa man, pila ka adlaw bag-o ini, nagpaulan na sang mga bomba ang duha ka eroplano nga B-1 sa nabagatnan sang Baghdad. Ginkamang man sang mga tropang Amerikano ang "demilitarized zone" nga pinakamalapit sa lindero sang Kuwait.

Sa pihak sang kahambugan sang US nahanungod sa ila *high tech* kag mas mabaskog nga armas, nagasalig gihapon ini nga masakup ang Iraq kon hungod magsurender ang mga suldadong Iraqi. Kadung-an sa sunod-sunod nga pagpamahug sa pumuluyong Iraqi, alagisod man ang US sa pagsabwag sang nanari-saring disimpormasyon, kabutigan kag mga kabuangan. Indi magkubos sa 17 milyones nga polyeto sang propaganda ang ginbuhos sang US sa sulod sang Iraq.

Insigida nga ginpanawagan para sa gilayon nga pagpauntat sang pagpangbomba ang China kag Russia. Gintawag nila nga "paglapas sa mga polisiya sang UN kag iban pa nga pangkalibutanon nga layi,"

"indi lehitimo" kag "indi nagakadapat" kag "wala ginpaminsar sang maayo."

Sa pihak nga bahin, nagpakita sang katalaw ang France kag Germany sa atubang sang pagpanglubag sang US. Halin sa mabaskog nga pagpamatuk sa agresyon, nagpakuntento na la-

ma n g  
ang mga  
ini sa  
"pagpre-  
para r  
sa da-

ku  
n g a  
kaswalti  
sa kubay  
sang mga

sibilyan nga Iraqi." Mas malaut pa, wala ginpunggan sang Germany nga gamiton sang mga eroplanong panggera sang US ang ila kahannginan.

Sa amo man, naggaguwa nga inutil ang UN sa atubang sang wala hawid-hawid nga pagpangbastos sang US sa tanan nga proseso nga diplomatiko kag pangpulitika sang kapulungan.

Pareho sa ginasaligan, halos magkaladasma sa paghatag suporta ang Pilipinas kag South Korea, lunsay malakolonya sang US. Nagpasugot man sa US ang Japan.

Nagpasugot man ang Turkey nga gamiton sang US ang kahannginan sang pungsod sa pag-atake. Namaniobra sang nagaharing partido sa Turkey ang bag-ong reorganisa nga parlamento agud pasugtan magsulod ang dugang nga 60,000 nga tropang Amerikano sa pungsod. Sadto pa man nga wala pormal nagapasugot ang parlamento, sunod-sunod ang pagpalusot sang pwersa kag kagamitan sang US sa naaminhang Iraq gamit ang mga puerto kag pasilidad sang Turkey.

Sa bisperas sang pagpanalakay, ang pinakamasuod sini nga alyado pareho sang UK kag Spain lamang ang masandigan sang US. Pero bisan ang mga ini nagaatubang sang mabaskog nga pagpamatuk kag pag-alsa sa sulod sang tagsa nila ka pungsod.

Nagsulunod nga nagbiya sa pwesto ang pila nga prominente nga myembro sang gubyerno ni

Tony Blair sang UK pagkatapos niya ideklarar ang wala kundisyon n g a  
pagsu-

porta sa pagpanggera sang US. Ginasuka siya sang iya mga kapartido kag nakuha lamang niya ang pagpasugot sang parlamento dala sang mga boto sang pangontra nga partido. Nagapanawagan na ang madamo sa iya kapartido para sa iya pagpanaog sa pwesto.

Sa US, UK kag Spain, natabo ang pinakadalagku nga demonstrasyon kag pinakamalapad nga kahublagang masa batuk sa gerang agresyon sa Iraq. Nakahanda man ang pumuluyo diri nga dalayon pamatukan ang gerang agresyon kag usuyon ang ila mga upisyal. **AB**





## Batok sa gera ang pumuluyong Pilipino

**Sa Luzon, Kabisayaan kag Mindanao, nagalanog ang mabaskog nga pagpakundenar sa gera sang US sa Iraq**

**S**a pihak sang mabaskog nga pagkundenar sang kadam-an nga pungsod sa kalibutan sa nakaumpisa pa lamang nga gera batuk sa Iraq, lubos kadamol sang guya nga gin-anunsyo ni Gloria Macapagal-Arroyo nga kabahin ang iya gubyerno sa ginatawag “coalition of the willing” nga hayagan nagasuporta diri.

Ginhingalitan man ni Macapagal-Arroyo ang madugay na niya ginakalangkan nga pag-umpisa sang gera agud mahatag-rason ang napahigad niya nga paggamit sang “emergency power” kag mapadali ang pagpasar sa “Anti-Terrorism Bill.”

Bag-o pa man suguran ang gera, ginapakita na ni Macapagal-Arroyo ang pag-ikug-ikog niya sa amo niya nga numero uno nga terorista sa kalibutan. Sunod-sunod ang mapintas nga pagbungkag sa matawhay nga demonstrasyon batuk sa gera sang US sa Iraq. Hapon sang Marso 20, wala-kaluoy nga ginpanglampusan, ginbomba sang tubig kag ginpangdakup sang mga pulis ang mga katapu sang Bagong

Alyansang Makabayan (BAYAN), Pamalakaya, Anakbayan, Anakpawis kag KMU. Bisan 12 sa ila ang nasa-kit, mas daku nga numero pa sang mga demonstrador ang nagbalik sa US Embassy, kalakip ang mga obispo, pari kag madre nga katapu sang Promotion of Church People’s Response, Justice not War Coalition, Bayan Muna, Moro-Christian Peoples Alliance, Migrante kag Gabriela.

Sadtong naman nga Marso 18, nag-abot sa 11 demonstrador, kalakip ang isa ka 10 katuig nga bata nga lalaki, ang nasamaran sang ginbungkag ang ila rali sa atubang man sang US embassy. May mga nabalian sang paa, batiis kag kamot kag naglitik ang ulo. Ginpang-

bakol kag ginpalukpan sang pusil sang pro-US kag anti-komunista nga Discovery Crusade of the Philippines ang isa ka grupo sang mga nagarali batuk sa gera.

Samtang, nagpagguwa sang anunsyo sa Philippine Daily Inquirer sining Marso 20 ang koalisyon Women Working for Peace batuk sa gera sang US sa Iraq. Luwas sa 31 kababaihan nga *convenor* sang koalisyon, pirmado ang adbvertisement sang masobra 160 madre, kababaihan nga diputado kag lokal nga upisyal, mga artista, tagamidya kag iban pa prominente nga lider kababaihan, mga titser kag estudyante sa 17 iskwelahan kag libu-libo pa nga iban. Suno sa koalisyon, nagakabalaka sila sa dangatan sang 1.4 milyones nga Pilipino sa Middle East, kon sa diin 65% mga babaye na *domestic helper*. Hambal nila, nagadaku ang bulnerabilidad sang kababaigan kag mga bata sa pagpanglugos kag sekswal nga abuso kon may gera. Ang pagpanglugos kada may gera isa ka moda sang tortyur kag pagpamigos, dugang pa nila.

Sa mga una nga oras sang pagsalakay sang US sa Baghdad kag iban pa nga bahin sang Iraq, nakig-isa ang mga Pilipino sa mga protesta sa 126 pungsod sa kalibutan. Luwas sa Metro Manila, naglu-pok ang mga aksyon protesta sa Baguio City kag sa Rizal, Quezon, Cavite, Laguna kag Occidental Mindoro. Paralisado ang bug-os nga Panay kag Guimaras sa welga batuk sa pagtaas sa presyo sang langis kag pagsalakay sang US sa Iraq. May mga paghulag man sa mga syudad sang Bacolod, Cebu, Davao, Cagayan de Oro kag Zamboanga.

Ginpakamalaut man sang mga senador kag kongresista nga katapu sang Legislators Against War (LAW) ang unilateral nga gera nga ini sang US.

Gin-anunsyo sang Justice not War Coalition ang paglunsar sang dalagkuan nga mga aksyong protesta umpisa subong nga Marso 22. **AB**

# Sabat sa armado nga interbensyon sang US


**Sa ika-34 anibersaryo sini, lubos ang kahandaan sang BHB nga dugang isulong ang inaway banwa**

**P**rinsipal nga tulungdanan sang BHB kag bilog nga rebolusyonaryong hublag ang pagpasulong sang inaway banwa. Labing kinahanglanon nga hugton ang paghakos sa tulungdan nga ini sa atubang sa nagagiting nga pungsodnon kag pangkalibutanon nga krisis sang nagaharing reaksyunaryong sistema. Labing nagakadunot kag nagapintas ang pagginahum sang imperyalismo kag reaksyon kag nagabaskog ang paghimakas sang mga rebolusyonaryong pwersa kag pumuluyo para sa demokrasya, pungsodnon nga kahilwayan, hustisya kag kalinungan.

Naisip na ang mga adlaw sang rehimeng Macapagal-Arroyo. Bangud desperado nga salbaron ang kaugalingon, labi pa sini nga ginpalain ang todo-todo nga kontra-rebolusyonaryong gera kaddungan sang labing pagpalapad kag pagpadalom sang interbensyon militar sang US sa Pilipinas.

Wala untat ang mga atake sini sa mga rebolusyonaryong pwersa kag baseng masa. Pero bangud wala ini sang paglaum nga magadaug sa BHB kag Moro Islamic Liberation Front (MILF), nakighimbon ang rehimen kag ang US agud direkta na nga idisposisyon ang mga pwersang Amerikano batuk sa mga rebolusyonaryong pwersa. Ginapamilit nila nga gamiton ang "gera kontra-terorismo" agud hatagan-rason ang pagpanggera sa mga rebolusyonaryong pwersa sa Pilipinas.

Sa atubang sang mabaskog nga pagpamatuk sang pumuluyo kag pati sang reaksyunaryong oposisyon kag pagkabuyagyag sa mga kabutigan sang rehimen, naubusan na sang mabaton nga kabangdanan ang magkahimbon Bush kag Macapagal-Arroyo agud hatagan-rason ang direkta agresyon sang US sa pungsod. Nagpadabuk sila sang pagpangbomba sa Davao City kag iban pang lugar sa Mindanao para direkta ipasibangud sa MILF kag indirekta sa BHB. Ginbuhian na nila ang kuno paglagas sa Abu Sayyaf kag wala li-p o d n g a ginpa-b u -



tyag ang plano nga pagpusisyon sang tropang pangkombat sang US sa mga base sang mga rebolusyonaryong pwersa: sa North Cotabato, isa sa mga base sang MILF, kag sa Occidental Mindoro kag Compostela Valley, mga base naman sang BHB.

Agud hatagan-dalan ini, sa du-so man sang US ginlapak sang rehimen ang sugilanon pangkalinungan

sa NDFP kag MILF. Sa baylo, dugang ginpatingkad ang himbunayan sang Bush kag Macapagal-Arroyo ang pamaagi militar nga pangu-nahon magasalig na sa agresyong US sa tuyo nga tapnaon ang rebolusyonaryong hublag. Agud hatagan-rason ang mga ini, ginpamilit sang US kag sang papet nga rehimen ang deklarasyon nga "terorista" ang Partido Komunista sang Pilipinas, BHB kag si Kaupod Jose Ma. Sison. Gindeklarar man subong sang papet nga rehimen nga "terorista" ang MILF.

Wala nakugmat ang mga rebolusyonaryong pwersa sa pamahug sang rehimen kag sang imperyalismong US. Wala nakulbaan ang BHB sa pamahug nga ipasulod ang mga tropang Amerikano sa mga prenteng gerilya kag teritoryo sang rebolusyonaryong hublag. Sa tion nga sumulod ang mga armadong pwersa sang US sa mga prenteng gerilya, igatransporma sang rebolusyonaryong hublag ang subong nga gera sibil padulong sa isa ka pungsodnon nga gera batuk sa US. Ang agresyon sang US ang magapadab-dab sang malapad nga patriyotikong oposisyon nga makapapukan sa subong nga papet nga rehimen ukon anuman nga rehimen nga magasakdag sang dumuluong nga armadong agresyon.

Igapabilin sang BHB ang subong nga dependsibo nga pusisyon sini sa subong nga halintang sang inaway banwa. Sa amo man, ano man nga pwersang pangkombat sang US nga idisposisyon sa sulod ukon sa kaiping sang mga teritoryo sang rebolusyonaryong hublag mangin target sang atake sang BHB kag pumuluyo. Magapabilin man nga pursigido ang paghulag sang Partido, BHB kag bug-os nga

sundan sa "Sabat...", pahina 6





## 98 armas naagaw sa reyd sa Surigao

NUBENTA'Y otso ka armas ang naagaw sang mga Pu-lang hangaway sa madinalag-on nga reyd sa armori sang PICOP Resources Inc. sa Barangay Tabon, Bislig, Surigao del Sur sining Marso 21.

Wala sang nahimo ang duha ka gwardya sang sud-lon sang BHB ang ginataguan sang mga armas sang Mission Security Agency kag sang CAFGU nga naga-serbi man nga pwersa pangseguridad sang PICOP.

Naagaw sa reyd ang 47 M14, 27 garan, 17 karbin, isa M16, duha .38, apat ka *shotgun* kag isa ka *two-way radio*.

Ang PICOP ang pinakadaku nga kumpanya nga nagahimo sang papel sa Pilipinas kag isa sa pinaka-daku sa bug-os nga Asia. Mahaba ang rekord sa pag-pamigos sang PICOP sa mga mamumugon sini kag sa mga mangunguma nga naga-estar sa palibot sang kumpanya.

## 9 armas nakumpiska sa reyd sa Agusan

NAGLAWIG lamang sang 15 minutos ang makahason ng pagsalakay sang Bagong Hukbong Bayan sa hed-kwarters sang pulisya kag munisipyo sang Carmen, Agusan del Norte sadtong gab-i sang Marso 16.

Nakibot ang tatlo ka pulis kag mga badigard ni Meyor Ramon Gato sang paulanan sila sang bala sang mga gerilya nga sakay sa duha ka trak. Nakigbaylu-hanay sila sang lupok pero madali sila nga nalutos sang ginsimpon nga pwersa sang Julito Tiro Command kag Cesar Cayan Command sang BHB-North Central Mindanao.

Naagaw sa reyd ang walo M16, isa M79, 500 ba-la, 40 magasin sang M16 kag isa ka base radio.

Nagtabang ang mga tropa militar pero wala na nila naabtan ang mga gerilya. Isa ka badigard sang alkalde ang napatay kag duha iba pa ang napilasan sa inaway.

### "Sabat...", halin sa pahina 5

rebolusyonaryong hublag agud pas-lawon ang dumuluong nga agre-syon kag palayason ang mga dumu-luong nga tropa sa Pilipinas.

Ginahatagan-tum-ok subong sang Partido kag bilog nga rebolusyonar-yong hublag ang mas malapad nga pag-abot kag pagpahulag sa pumu-luyo, ang pagpahamulag kag pag-papukan sa lubos nga papet, mapi-guson kag garuk nga rehimeng US-Macapagal-Arroyo, kag pagbatu sa nagaigting nga interbensyon mili-tar sang US. Pagakumprontahon kag pagabatuan sini ang mga ma-sunod pang papet nga rehimen.

Ginahatagan sang partikular nga atensyon ang pila ka yabing sangkap sa paghanda sang hanga-way sang banwa kag pagsulong sang armadong paghimakas. Pag-handa man ang mga ini sa labing nagalapit nga posibilidad sang agre-syong militar sang US batuk sa mga rebolusyonaryong pwersa kag baseng masa.

► Pukawon, organisahon kag pahulagon ang minilyun-milyon nga pumuluho para magpasakup kag sumuporta sa armadong paghi-

makas kag kahublagang masa. Ma-damuan nga tukuron ang mga rebo-lusyonaryong organisasyong masa, milisya kag sanga sang Partido sa puong-puong tubtub sa nagapada-mo nga baryo kag mga banwa. Hu-got pa nga papagsikon ang mga paghimakas antipyudal kag iban pa nga paghulag sang masa. Palapa-ron kag pabaskugon ang nagahili-ugyong prente. Hugton ang angot kag buligay sang mga kahublagan sa kaumhan kag kasyudaran.

► Hugot nga palaparon, paga-tabu-tabuon kag pabakuron ang mga prenteng gerilya kag himuon nga dasok ang mga ini sa pamaagi sang pagsiguro nga may natukod nga basehang yunit sang hangaway sa mga munisipalidad sa sakup sang mga prenteng gerilya.

► Pabaskugon ang rekrutment sa BHB halin sa malapad nga ba-seng masa sa kaumhan santu sa mga rekisitos kag pagsulundan, amo man ang suporta nga tawo, materyal kag pulitikal halin sa kasyudaran.

► Pataason ang kahanasan pu-litiko-militar sang mga upisyal kag hangaway para sa katalumon sa pu-litika, pagpamuno kag ikasarang mag-away.

► Lagson ang nagakaigo nga pag-armas sa nagadaku nga pwersa sang hangaway sang banwa, pa-ngunahon na sa paagi sang mga taktikal nga opensiba.

► Aregluhon ang platun-kada-ku nga basehang pormasyon sang BHB, ang kusog-kumpanyang pwersa sa kada prenteng gerilya, ang nagakaigo nga bertikalisasyon kag ang sistema sang relatibong konsentrasyon kag dispersal, agud magin mas epektibo sa pagdepensa batuk sa kaaway, pagpatuman sang mga hilikuton pangpulitika kag paglunsar sang mga taktikal nga opensiba.

► Aregluhon ang nanari-saring hilikuton pangpulitika sa kubay sang mga reaksyunaryong arma-dong pwersa.

► Determinado kag malig-on nga papagsikon ang mga taktikal nga opensiba, labi na ang mga may daku nga importansya sa pulitika kag makaani sang mga armas. Gi-nasaligan sa mga masunod nga tu-ig ang mas madamu, mas masunson kag mas lapnagon nga mga taktikal nga opensiba batuk sa mga yunit sang AFP kag PNP kag paramilitar nga nagaatake sa rebolusyonaryong

## Istasyon sang PNP ginsalakay, komboy sang Philippine Army gin-ambusan

Sining Marso 8, madinalag-on nga ginsalakay sang BHB ang istasyon sang pulisya sa isa ka banwa kag gin-ambusan ang duha ka hubon sang Philippine Army. Sa tatlo ka taktikal nga opensiba, 16 armas ang naagaw, apat suldado lakip ang isa ka tinyente ang napatay, kag apat ang napilasan.

**Samar.** Dungan nga sumalakay sa banwa sang Calbiga ang duha ka hubon sang Jovito Ragay Command sang BHB-Nabagatnan Samar. Ginreyd sang una nga hubon ang istasyon sang Calbiga PNP. Wala makabatu ang mga pulis sa kadasigon sang atake. Isa-isa naman nga ginreyd sang ikaduha nga hubon ang mga balay sang mga masupog nga kontra-rebolusyonaryo kag malain nga elemento.

Nakakumpiska ang mga Pulang hangaway sang anom M16, isa ka *shotgun*, isa .38 kag duha 9 mm nga pistola. Sa daku nga kahuy-anan sang kaaway, ginsipa sa pwesto ang hepe sang Calbiga PNP.

**Bohol.** Banda udto adlaw, gin-ambus sang mga gerilyang BHB sa banwa sang Mabini ang isa komboy sang Philippine Army nga pauli halin sa pagpatrulya. Ang mga suldado sang 15th IB sakay sa dyip nga Kennedy-type kag isa *mini-cruiser* sang ambusan sila sa Sityo Bugtong, Barangay San Isidro.

Apat suldado ang napatay sa inaway, lakip si 1Lt. Ronie Bungaos, intelligence officer sang 15th IB. Duha pa ka tropa ang napilasan.

Apat M16, isa M203, isa M79 kag mga bala ang naagaw sang mga Pulang hangaway.

**Albay.** Sa Barangay Tupas, Ligao City, gin-ambusan sang BHB ang nagapatrulya nga mga tropa sang 22nd IB banda alas 8:30 sa agahon. Napilasan si 2Lt. Rogel Hegana, *commanding officer* sang "B" Coy, kag isa pa ka sarhento.



## Napaslawan ang *all-out war* sa Panay

### Ang kumand ng SOT sa Panay napapas sang mga Pulang hangaway

Pebrero 24, 2003, alas 5:30 sang hapon, gin-ambusan sang isa ka yunit sang BHB ang isa ka iskward sang SOT (Special Operations Team) sang Task Force Panay sa sapa sang Sibagwan, Barangay Daan Sur, Tapaz, Capiz. Napatay sa inaway nga ini sanday Capt. Francisco Fonteveros, ang kumander sang SOT sa Panay, apat pa ka suldado kag ang giya nila nga elemento sang CAFGU. Pilason ang isa pa ka suldado. Naagaw sang yunit sang BHB ang lima riple M16, isa M14, madamo nga bala kag isa *two-way radio*. Nag-abot sang mas o menos 45 minutos ang inaway.

Namartir sa inaway si Kaupod Ismaelito "Ka Bob" Giganto, kumander sang BHB sa Central Front.

Ginapangin-wala sang kadalag-an nga ini ang nauna nga deklarasyon sang Task Force Panay (TFP) sa idalom sang 3rd ID nga napapas na nila ang BHB sa Tapaz. Ginapabugal nila nga igasaylo na sang SOT sa pwersang impantri kag CAFGU ang kontrol sa nasambit nga banwa.

Magaduha ka tuig na nga gintutukan sang TFP ang prenteng gerilya sa Central Panay bilang isa sa mga prayoridad nga waskon sang 3rd ID tubtub sa katapusan sang tuig 2002, sa idalom sang polisiya nga *all-out war* sang rehimeng US-Macapagal-Arroyo. Umpisa sadtong Mayo 2001, gintum-ukan sang TFD ang nagapadaku nga pwersa sini sa sentral nga prente. Sadtong Oktubre 2002 nag-abot sa duha-sa-tatlo (2/3) sang bilog nga pwersa militar sa Panay ang nakaplastar sa mas o menos tatlo ka banwa lamang sa lindero sang mga



prubinsya sang Capiz, Iloilo kag Aklan. Kalakip sa mga pwersa nga ini ang 12th IB, ang Provisional Battalion (PIB), ang SOT, mga CAFGU kag Army Engineering Battalion.

Ang lugar nga ila ginakonsentran amo ang duta sang katigulangan sang mga Tumanduk, isa ka paungsodnon nga minority sa Panay. Mabaskog ang suporta sang mga Tumanduk sa rebolusyonaryong hublag bangud sa bulig sini sa ila paghimakas batuk sa pag-agaw sa ila duta. Sa kamatuoran, ang martir nga si Ka Bob isa ka isganan nga Pulang kumander nga naghaling sa kubay sang mga Tumanduk.

Gindisposisyon sa intermedya nga bahin sang Tapaz, sa walo ka magkatambi nga baryo, ang una nga bats sang SOT sa idalom mismo sang 3rd ID sadtong Nobyembre-Disyembre 2001. Naglunsar ini sang mga operasyong kombatan kag saywar agud piliton ang pumuluyo nga mag-entra sa CAFGU kag Barrio Intelligence Network (BIN). Sad-



**Kag pareho sang una, nag-ani sang nagapadaku nga protesta sa pumuluyo ang amo sini nga pagpang-abuso sa tawhanon nga kinamatarung, kag labing nagdamo ang nagdesisyon mag-entra sa hangaway sang banwa.**

tong Hulyo 2002, ginplastar naman sa mabukid nga bahin ang ikatlong bats sang SOT kag ginpaidalom sa TFP (ang ikaduha nga bats sa Bohol ginbutang). Samtang, ginplastar man sa mga baryo nga nagapalibot sa erylal nga ginasakupan sang SOT ang mga pwersa sang 12th IB bilang pwersa pangseguridad.

Pero sa pagtapos sang halos duha ka tuig, wala naagum sang TFP ang katuyuan sini nga makarekrut sang mga elemento sang CAFGU kag BIN sa kada baryo. Tigaylo sini, di makaabot sa katunga sang target ang nakuha kag ang

mga nagpa-entra pila sa daan na nga malain nga elemento nga ginasuka sang pumuluyo sa lugar.

Sa mahaba nga panahon nga pagpundo sang reaksyunaryong militar sa kabukiran, labi nilang ginabuso ang pumuluyo. Kalakip sa ila pagpanamad ang pwersahan nga pagkonsentrar sang mga tawo sa baryo kag pagpatuman sang curfew, pagpamad sang mga pananom, pagdakup kag pagpamahug sa mga ginasuspetsahan aktibo sa hublag kag pagtuyo manglugos. Ginluthag nila si Dante Parle, isa kabataan nga ginaakusahan nila katapu sang

## Mga suldado nga Amerikano sa Central Panay

**G**inatum-ukan sang militar ang Central Panay indi lang bangud sa nagasulong diri ang rebolusyonaryong hublag. Isa ini sa posible butangan sang mga tropang Amerikano sa balayon sang nagapadalom kag nagapalapad nga armadong interbensyon sang US sa pungsod.

Sadtong Marso 5, 2003, nag-abot sa Camp Macario Peralta ang isa ka contingent sang mga suldadong Amerikano halin sa Sulu para kuno sa paghanas medikal sa mga suldadong Pilipino. Pero talalupangdon nga wala ni isa ka duktor sa nasam-bit nga *contingent*.

Ang Central Panay ginabug-os sang 24 baryo sa mga banwa sang Tapaz kag Jamindan kag nagasakup sa 12% sang bilog nga kadutaan sang prubinsya sang Capiz. Diri ang 33,310 ektarya nga duta sang katigulangan sang mga Tumanduk nga madugay na ginaagaw sang AFP agud lunsaran sang *war games*.

Diri nakapusisyon ang Camp Macario Peralta nga maluwas sa hedkwarters sang 3rd ID isa ini sa pinakamalapad nga training ground umpisa nga ginsaylo sa pangsibilyan nga gamit ang Sangley Point sa Cavite. Diri ginalunsar ang nagkalain-lain nga paghanas sang mga suldado. Diri man nagahimo sang testing sang mga armas kag bomba.

Sugod sadtong 1994 gintuyo na sang 3rd ID nga pahalilon ang mga naga-estar diri nga ginatawag nila mga iskwat. Sadtong Disyembre 1995, apat ka tawo, lakip ang duha ka bata, ang napilasan sang ginatilawan ang bomba nga nagkabos sa target kag nag-igo sa mga pamalay. Sang Oktubre 1994, ginlunsar diri ang masobra isa ka simana nga extension training sang Balikatan nga gintambungan sang mas o menos 350 suldadong Amerikano nga may dala nga nanari-saring eroplano panggera kag mga bomba.

AB



BHB. Kasugpon lamang ini sang mahaba man nga kasaysayan sang pagpamigos sa mga pungsodnon nga minorya sa Tapaz umpisa pa sadtong panahon sang rehimeng US-Marcos. Kag pareho sang una, nag-ani sang nagapadaku nga protesta sa pumuluyo ang amo sini nga pagpang-abuso sa tawhanon nga kinamatarung, kag labing nagdamo ang nagdesisyon mag-entra sa hangaway sang banwa.

Luwas sa pagtarget nga waskon ang rebolusyonaryo nga organisasyong masa, ginatuyo man nila nga lagson kag waskon ang mga yunit sang BHB. Naglunsar ang mga ini sang mga operasyong kombatan. May mga bulan nga sobra pa sa duha ka operasyon nga batalyon-kadaku ang ginalunsar.

Sa amo pa man, wala sang natabo nga desaysibo nga engkwentro sa mga yunit sang BHB bangud ginaamligan sang pumuluyo ang kaluwasan sang hangaway kag sang mga organisasyong masa.

Napilitan na lamang ang militar nga mag-imbento sang mga engkwentro pareho sang natabo sadtong Nobyembre 27, 2002 sa Santa Carmen, Dumalag, Capiz, kon sa di-in ginbaril kag napatay ang isa ka suldado sang pareho man niya nga suldado kag grabe nga napilasan ang isa pa. Nagahimo sadto ang 12th sang isa ka combat *clearing operation*. Ginpabugal ini sang TFP bilang engkwentro sa BHB kag ginpadungan pa ang ila ginpatay.

Pagapaslawon sang BHB ang tanan nga kontra-rebolusyonaryong kampanya sang rehimeng Macapagal-Arroyo. Sa suporta sang masa, padayon ini nga nagabaskog kag nagakusog, katuwang sang mga rebolusyonaryo nga organisasyong masa sang mga pungsodnon nga minorya agud dugang pangapinan ang duta sang ila katigulangan. AB

## Isnagan nga Pulang kumander

**Sanday Ka Bob kag Ka Berto ang mga baganihan sang mga pungsodnon nga minorya kag sang pumuluyong Pilipino**

**B**ilang pagpasaludo sa tanan nga Pulang kumander kag hangaway sang Bagong Hukbong Bayan, ginabantala sang *Ang Bayan* ang mga pagpasidunggog sa duha ka martir nga kumander nga wala kangilin nga nag-alagad sa rebolusyon kag sa pumuluyo. Luwas sa ila pinasahi nga rekord sa pulitika, masanag nga halimbawa sanday Ismaelito "Ka Bob" Giganto kag Ado "Ka Berto" sang desisyon kag kadalagan sang mga pungsodnon nga minorya nga aktibo nagapasakup sa pungsodnon nga rebolusyonaryong pagbag-o.

Si Ka Bob namatay nga nagapakig-away sa mga tropa sang kaway sa Tapaz, Capiz sadtong Pebrero 24, 2003. Si Ka Berto naman namatay samtang nagatungod sang rebolusyonaryong hilikutan sadtong Enero.

**K**a Bob (Salhin kag ginkuha sa pasidunggog sang Komite ng Rehiyunal sang PKP sa Panay)

Isa ka tumanduk si Ka Bob, isa sa mga pungsodnon nga minorya nga konsentrado sa sentral nga bahin sang Panay.

Kabahin ang pamilya ni Ka Bob sa mga ginpahalalan sang gamiton lugar sang paghanas-militar ang Tapaz kag Jamindan, Capiz sadtong 1962. Gin-agaw man kag ginhimo nga pastuhan sang dalagku nga agalon nga mayduta ang ila kadutaan sa Tapaz.

Ang pamilya ni Ka Bob amo ang isa sa pinakaaktibo sa paghimakas sang mag-abot ang BHB sa ila lugar kag organisahan ang mga Tumanduk sadtong 1972. Laking ang iya amay nga si Mal-am Benig, ginatahud nga lider sang

mga Tumanduk, ginabuyok sang ila pamilya ang iban pa nga lider sang mga baryo agud magsuporta sa BHB. Nangin madinalag-on ang kahublagang masa nga ginlunsar nila batuk sa tumado, isa ka porma sang renta sa duta nga ginapamtuman sang Philippine Army. Antes mag-entra sa BHB, isa si Ka Bob sa mga aktibista nga naghimakas para sa tunay nga reporma sa duta batuk sa dalagku nga agalon nga mayduta.

Tuig 1984 sang mag-entra si Ka Bob sa BHB. Nagpasakup siya sa madamo nga madinalag-on nga aksyong militar. Maayo niya nga gingamit ang pagkabisar niya sa tereyn, ang iya malapit nga relasyon sa pumuluyo kag kaalaman sa kultura kag kasaysayan sang mga Tumanduk.

Bisan nag-entra siya sa panahon sang mga paglihisan sadtong dekada 1980, nagpabilin nga malig-on ang iya rebolusyonaryong panindugan. Pagkatapos sang pila ka tuig, ginbutang siya bilang Pulang kumander sang pangunahon nga yunit gerilya sang prente nga





nagasakup sa Tapaz, Jamindan kag Calinog sa Capiz. Madinalag-on nga napangibabawan sang yunit nga iya ginapamunuan ang kapintas sang ginlunsar nga todo-gera kag iskema nga *gradual constriction* sang rehimeng US-Ramos sa pamaagi nga maayo nga angot sa masa.

Nangin maayo man nga kadre sang Partido si Ka Bob. Katapu siya sang Komiteng Rehiyon sang Partido sa Panay. Nangin mapisan siya sa pag-intiende sa mga Tumanduk sa lokalidad kag sang kumprehensibo ngapagpasulong sa rebolusyon. Daku ang naibulig niya sa pagrekoher sa mga lugar nga daan ginahulagan sang BHB.

Daku man ang gintungdan nga papel ni Ka Bob sa tagapatunga sa mga away sang mga magkaaway nga pamilya kag mga baryo. Mapasensiyahon niya nga ginatudlo ang pagtukod sang mga organisasyong masa, ang demokratisasyon kag kolektibo nga pagpamuno sa paagi nga indi makalapak sa sistema sang hustisya sang mga Tumanduk kag sa mga tradisyunal nila nga mga pinuno.

Ginasalaming ni Ka Bob ang mas mataas nga lebel sang paghimakas nga ginlab-ot sang mga Tumanduk. Indi lamang siya nangin maisog nga hangaway nga Tumanduk ukon maalam kag ginatahud nga lider sang tribo. Siya ang nangin tunay nga proletaryo nga rebolusyonaryong lider.

**K**a Berto (Kuha sa pasidunggog sadtong Pebrero 9 sang mas mataas nga organo sang iya yunit)

Ado ang tunay nga pangalan ni Ka Berto. Pareho sang madamo pa

nga Aggay (isa ka grupo sang minorya sa bahin sang Sierra Madre nga ara sa Nabagatnang Luzon), wala siya sang apelyido.

Naangutan kag nag-entra siya sa Isabela, sadtong bag-o nga tukod pa lang ang BHB, masobra 30 anyos na ang nakalipas. Isa siya sa mga minorya nga pinakauna nga naangutan kag nag-entra kag isa man sa mga kumander kag hangaway

sang BHB—minorya man ukon indi—nga pinakamadugay sa hangaway.

Sa masobra 30 tuig tubtub sa pagkamatay, ang hangaway, ang Partido kag ang rebolusyonaryong hublag ang iya solo nga pamilya kag kabuhi. Namatay ang iya asawa sa ina-

way sa isa ka daku kag importante nga misyon sang wala pa sila magdugay sa hangaway. Ang solo niya nga anak namatay man nga katapu sang hublag. Ang iya utod sining ulihi lamang niya ginbisitahan pagkarapos sang madamo nga tuig.

Bag-o pa man nagpasakup sa hangaway, si Kaupod Berto ginahangay sang pumuluyo sa malapad nga bahin sang Sierra Madre. Kilala nga maisog ang ila tribo; pero mas malahalón, tumalagsahon ang lebel sang kahanasan ni Kaupod Berto bilang mangangayam kag manuglighot-talon, pinasahi ang iya duna nga kaalam, kaisog, lapad sang paghangup, maayong buot, kag maayo makibagay sa uban, minorya man ukon indi.

Ang mga una nga bahin sang paghulag ni Kaupod Berto sa hangaway amo ang sa armadong yunit pangpropaganda kag yunit gerilya kag ang nagtaliwan nga 20 tuig sa isa ka yunit pangsupta. Ma-

damo nga madinalag-on kag bakbakay nga inaway ang iya naupdan. Bilang kumander sang iya yunit, ginpamunuan niya ang pag-atubang kag pagbatu sa madamo nga dalagkuan nga kampanya kag operasyon sang kaaway. Napamatud-an sa mga inaway ang kaayo niya bilang isnayper. Ginkilala man siya bilang treynor sang BHB.

Sa yunit nga iya ginapasakup-an, si Kaupod Berto sa masami man tagalugpay sa mga kaupod nga nagadali, nangin mainiton ukon indigani nagaway-away. Sa panahon sang ipit-ipit nga sitwasyon kag init, siya ang masami nagapamangan kag nagapalingaw sa mga kaupod paagi sa mga paglahog, masinadyahon nga komentaryo kag makakaladlaw nga istorya.

Bangud malig-on kag kumpanyasado sa iya ikasarang kag bug-os ang buot sa pakigrelasyon sa mga kaupod sa Partido kag hangaway, indi san-o man nangin problema ni Kaupod Berto ang pakigrelasyon sa kaupod kag sa masa nga indi minorya. Pareho kag wala sang ginapili nga pamanit ukon relihiyon ang iya pagpakigrelasyon sa iban. Isa ka istorya nga naham-utan niya amo eksperensya sa mga may sarang nga mangunguma nga indi makahibalo kon paano siya trataron kon hambalon niya nga siya, ang Ita, ang kumander sang yunit sang hangaway.

Pareho sa madamo nga iban pa nga martir sang rebolusyon, si Kaupod Berto ginlubong sa tunga sang kagulangan nga iya natumbahan, malayo sa lugar nga iya gintawhan. Kis-a ginhambal ni Kaupod Mao Zedong, “Wala sa halambalanon kon ilubong ang isa ka baganihan kon sa diin siya napukan. Ang malahalón nga nabuhi kag namatay siya nga tampad nga nagaalagad sa rebolusyon kag sa pumuluyo.” Amo sina si Kaupod Berto, isganang baganihan sang pumuluyo kag rebolusyong Pilipino.

AB

## Mga bihag sang BHB kag MILF, pagahilwayon na

PAGAHILWAYON na sang BHB kag MILF ang ila tagsa-tagsa ka mga bihag sang gera bilang pagpakita sang katampad sa ginahandum nga kalinungan. Ginaanunsyo ini sa isa ka dayalog sadtong Marso 15 nga ginapasakupan nanday Al Hadj Murad, Vice Chairman for Military

Affairs sang MILF, Ka Allan Juanito sang Komisyon sang PKP sa Mindanao; Jorge "Ka Oris" Madlos, tagapamaba sang NDF-Mindanao; kag 15 obispo nga Katoliko, mga Muslim ulama, mga lider sektoral kag iban pa.

Pito tropa sang gubyerno ang ginbihag sang MILF sadtong Marso

6 sa Barangay Tingin-Tinginibn, Balo-I, Lanao del Norte. Ginaareglo na lamang ang mga dokumento sang pagpahilway sa ila. Samtang, kumpirmasyon na lamang ang pamunuan sang PKP ang ginahulat agud mahilway na ang mga bihag sang BHB.



## Paglapas sa tawhanon nga kinamatarung sa Central Mindanao, nagalala

NAGALALA ang kahimtangan sang tawhanon nga kinamatarung sa Central Mindanao. Sa Pikit, North Cotabato, nag-abot na sa 41,000 ang mga nag-ebakwet kag 16 (14 ang mga bata) ang namatay sa tigdas sa gutok nga mga *evacuation center* umpisa nga nag-ibwal liwat ang mga inaway sa tunga sang AFP kag MILF.

Sa ginhiwat nga *fact-finding mission* didto umpisa Pebrero 28 tubtub Marso 4, nausisaan sang Karapatan, Moro-Christian Peoples Alliance (MCPA) kag Bayan Muna nga indi magnubo sa 38,808 katawo ukon 60% sang populasyon sang Pikit ang nadulaan sang mga ilistarán.

May nalista nga lima ka sibilyan ginsalbyeds (duha sa ila mga bata halin sa Datu Piang, Maguindanao); kag anom katawo ang iligal gin-aresto sa Barangay Kidama. May 161 balay ang ginsunog sang mga elemento sang 40th IB: 84 sa North Cotabato kag 77 sa Sharif Aguak, Maguindanao. Sa pangkabilugan, may naidokumento nga 35 kaso sang pwersahan nga pagpaebakwet, kon sa diin 12 ang namatay; apat kaso sang

pagpangbomba; 10 kaso sang pagpangsalbeyds; kag 44 kaso sang pagpamuyong. Lapnagon man ang pagpanamad sa mga istruktura pangrelihiyon.

Suno man sa Diocese of Kidapawan City, antes ang pinakaulihi nga kaso sang pag-ebakwet, nagadutdutan na ang 15,445 pamilya ukon 62,195 katawo sa 100 *evacuation center*. Sadtong Marso 1, pila sa mga nag-ebakwet ang nagtilaw nga magbalik sa Sityo Galingayon, Barangay Maksabual sa Pikit. Pero ginsunog sang mga suldado sang 40th IB ang 27 sa ila mga balay sadtong Marso 3.

Bangud sa makaluluoy nga kahimtangan nga ini, ginapamilit sang Katapatan, MCPA, Bayan Muna kag mga asosasyon para sa ikaayong lawas nga imbestigahan sang Kongreso ang mga nagkalatabo. Kadungan man nga ginlunsar ang nasambit nga mga organisasyon ang pangkalibutanon nga kampanya para ipamilit kanday Macapagal-Arroyo kag Sec. Angelo Reyes sang Department of National Defense nga gilayon pauntaton ang mga operasyon militar sa Central Mindanao.

## Kampanya Defend Sison, nagalapad

PADAYON nga nagaani sang malapad nga suporta sa luwas sang dagat ang kampanya para kuhaon ang BHB kag si Kaupod Jose Ma. Sison sa listahan sang mga "terorista." Nagalapad man ang suporta para sa kinamatarung ni Sison bilang isa ka *political refugee*.

Suno kay Ruth de Leon sang Committee Defend, padayon ang mga aksyong protesta sa nanari-saring bahin sang pungsod para sa mga kinamatarung ni Sison. Kalakip sini ang mga demonstrasyon, piket, pagpadala sang mga sulat at mga petisyon, pagtipon sang mga pirma, mga pangkultura palaguwaon,

mga porum kag pag-lobby sa European Parliament kag sa gubyernong US. Sa subong, nagaabot na sa 50,000 ang nagpirma sa dseklarasyon sang suporta nga igahatag sa European Commisison sa Abril 15.

Nagboluntaryo naman bilang dugang nga abugado ni Sison si Ramsey Clark, US Attorney General sadtong panahon sang adminsitasyong Lyndon B. Lohson. Siya ang nagpundar sang International Action Center, nga sa subong amo ang sentro sang dalagkuan nga mobilisasyon batuk sa pagpanggera sang US sa Iraq.

## Kababainhan batuk sa interbensyon militar sang US

SADTONG Marso 8, Pangkalibutanon nga Adlaw sang Kababainhan nga Anakbalhas, libu-libo ngba kababainhan ang nanindugan kag nagbuhos sa mga kalye agud ipaabot lunsay kanday George Bush kag kay Gloria Macapagal-Arroyo ang ila mabaskog nga kaakig kag pagkangil-ad sa paglapak sang imperyalismong US kag sang papet nga republika sa pungsodnon nga sobe-ranya. Sa pagpanguna sang Gabriela, nanawagan ang kababainhan para sa gilayon nga pagpahalín kay Macapagal-Arroyo.

Suno pa sa ila, indi lamang mangin direkta nga kaswalti sang gera ang kababainhan. Palalaon man sang interbensyon militar sang US ang “sex trafficking” kag pwersahan nga pagrekut sang kababainhan sa “negosyo sang unod.” Sang ginlunsar ang Balikatan 02-1 sadtong nagtaliwan nga tuig, ginreport ang lapnagon nga rekrutment sang mga bata nga kababainhan (edad 13-18) sa sentro sang Davao agud ipadala sa Zamboanga kon sa diin nakabase ang mga tropang Amerikano.

Maluwas sa 3,000 kababainhan kag bata nga nagmartsa pakadto sa taytay sang Mendiola sa Maynila, masobra 1,000 katapu sang Bicol Concerned Women for Nationalism

(Bicolana) ang nagrali sa kampo sang 19th IB sa Pilar, Sorsogon.

Sa Borongan, Eastern Samar, nagmartsa sa ulan ang 2,000 madre kag pari nga Katoliko, seminarista, iban pa nga relihiyosong sektor, mangu-nguma kag drayber sang traysikel. Kadungan sang pagsaulog sang adlaw sang kababainhan, mabaskog nila ginpakita ang pagpamatuk sa

nagahana nga gera sang US sa Iraq.

Sa Bacolod City, nagpasakup ang 1,500 mamumugon nga kababainhan sa duha ka adlaw nga *noise barrage* kag martsa sang Alliance of Youth Against War (AYAW).

May paghulag man ang Innabuyog-Gabriela, Dinteg Alternative Law Center at Cordillera Peoples Alliance sa Baguio City.



### Stalin, padayon nga ginadayaw

LIBU-LIBO nga pumuluyo ang nagduaw sa lulubngan ni Josef Stalin, lider komunista sang anay Union of Soviet Socialist Republics (USSR) sa ika-50 anibersaryo sang iya pagkapatay sining Marso 5. Dala ang bandera sang anay USSR, naghalad sila sang mga pulang bulak para sa isa ka dungganon nga lider kag amay sang pungsod. Kadam-an sa mga nagtambong mga beterano sang Ikaduha nga Inaway Pangkalibutanon kag mga suldado nga nagdepensa sa USSR batuk sa pagpanakup sang pasista nga si Hitler.

Kadam-an nga Ruso kag iban pang pumuluyo sa anay USSR, labi na yadto mga tigulang, ang nagalantaw kay Stalin bilang isa ka maayo kag makatawo nga lider. Sa idalom sang iya pagpamuno, nagsanyog ang USSR bilang isa ka makagagahum nga sosyalistang pungsod.

Si Stalin ang nagbulos bilang pangkabilugan nga sekretaryo sang Communist Party of the Soviet Union (CPSU) sang mamatay si Vladimir Lenin sadtong 1924. Bag-o sini, nagserbisyo siya bilang editor sang *Pravda*, upisyal nga pahayagan sang CPSU. Umpisa 1928 tuhtub 1941, ginpatuman niya ang magkasunod nga lima-ka-tuig nga plano nga nagpauswag kag nagpasanyog sa industriya kag agrikultura sang USSR.

## TESDA nagpalapnag sang prostitusyon

NABUYAGYAG subong nga Marso ang papel sang Technical Education and Skills Development Authority (TESDA) sa pagpalapnag sang prostitusyon. Ang TESDA ang ahensya sang gubyerno nga nagaaprubar sa Artist's Record Book (ARB) nga nagapamatuod kuno nga may kahanasan sa mga arte pareho sang pagsaot kag pagkanta ang isa ka aplikante nga gusto magtrabaho bilang overseas performing artist. Kadam-an sa mga gusto mag-angkon sang ARB mga aplikante para magtrabaho sa Japan bilang manuglingaw.

Suno sa Development Action for Women Network (DAWN), nga amo ang nagbuyagyag sa anomalya, nag-aabot sa P45,000 ang ginabayad sang mga aplikante

nga wala kahanasan sa arte para lamang mahatagan sila sang ARB. Hambal sang DAWN, nagserbi nga bugaw ang gubyerno bangud sa amo sini nga pagdihot.

Nabuyagyag man ang daku nga papel ni Dante Liban, Director General sang TESDA, sa anomalya nga ini. Ginapabugal mismo ni Liban nga sa sulod sang una nga walo ka bulan sang iya panerbisyo, 55,000 ARB ang iya ginpirmahan. Madamo sa mga ARB nga ini, siling sang DAWN, amo ang daan na nga pirmado kag ginabaligya sa mga desperado nga aplikante sa daku nga kantidad.

Bangud sa mabaskog nga pagpakamalut, napilitan magbiya sa pwesto si Liban sining Marso 14.